

БИШЬХАН АРТИСТНАР

Газаагуур наадахаяа болижо, үдэшэлэн элдэб олон үнгэтэ һарабша дороһоо гоё һайхан гэрэлэй сасархада, Цыпилма Эржэн хоёр гэр бүлынхидтөө заримдаа наада харуулжа эхилдэг байба. Ороной урда дэлгээтэй байһан ковёрые баабайнь басагадаа өөгшөөн, таһалгын тэг дунда асаржа үгэнэ. Тэдэнэр плати, ботинкануудаа тайлаад, майка, трусынуудаараа элдэб упражненинүүдые хэжэ захалба.

Би тэдэ хоёрой миин табатай, зургаатайнууд аад, һүбэлгэн бэрхэнүүдыень гайхааб. Ковёр дээрэ хэбтээд, хоёр гараараа газар тулан нугаржа, толгойдоо хүлнүүдээ хүргэн, “баха” болоно. Номер харуулһанайнь лэ удаа бидэ альга ташан, басагадые дэмжэнэбди. Баабайнгаа уриханаар энеэбхилэн һуухада, эхынгээ толгойнуудыень эльбэхэдэ, Цыпилма Эржэн хоёр бүри согтойнууд болохо юм.

Нариихан нугархай бээнүүдынь элдэб орёо упражненинүүдые хээд лэ байна. Гарнуудаараа газар тулан, хоёр хүлнүүдээ сэхэ өөдэнь хаяад, “хуһан” болоно. Хойшоо унажа нугаран, “хүүргэ” хэнэ. Хоюулан “хүүргэ” болоод байхадань, хүгшэн эжынь:

– Юрэдөө, нюрга һээрын гэмтэшэхэнь бэшэ гээшэ гү, болиит, хүрөө болгыт, – гэжэ һүхирбэ.

– Тиигэхэньшье буруу бэшэ. Бишье ямар аймшагтайгаар нугарнаб гэжэ һуубаб. Харин тэрэ хоёрнай хүгшэн эжынгээ тиигэжэ һүхирхэдэ, бүри хабаяа харуулхаяа оролдон, “хүүргэ” болоод, үшөө удаан байба. Би ядахадаа, ошожо абахамни гээшэ гү гэжэ һанаад, даб гэбэб. Тиигэхэмнишье тэрэ – Цыпилма Эржэн хоёр нугагад гэжэ эрьелдээд бодошобо.

Баабай, эжы, Галя абгай гэнэнүүдыень харахадамни, һанаа амарнууд һуужа байба. Тиихэдэнь бишье яхашьегүй юм ха юм гэжэ ойлгобоб.

Энээнһээ гадна тэдэнэр үшөө дуу дуулажа, шүлэг хэлэжэ, хатаржа шададаг байгаа бэлэй. Эржэнэйнгээ дуу дуулахаа байхадань, Цыпилмань: Арадай артистка Эржэн Доржиевна “Алдарта Байгал” гэжэ дуу дуулахань” – гээд мэдээсэхэ юм. Цыпилмагайнгаа шүлэг хэлэхэ байгаа наа Эржэниинь: “Мүнөө танда суута артистка Цыпилма Доржиевна “Октябрь” гэжэ шүлэг уран найханаар уншахань,” – гээд мэдээсэнэ.

Тэдэнэй номернуудаа гүйсэдхэхэ бүхэндэнь хэнһээшье үлүүгээр Галя абгайн баярлана, юундэб гэхэдэ, эдэ бүгэдэ Галиин хургаһанай үрэ ха юм. Тэрэ табадахи класста һурадаг, тээд гимнастикаар хургуулингаа чемпион, мүн баһа һуралсалдаа эрхим.

– Ши чемпион болотороо спортоор оролдожо байгаад, хайшан гэжэ хургуулидаа эрхимээр һуража үрдинэбши? – гэжэ минии гайхахада, Галя уругаа хараад, гараараа юумэ шэмхэлжэ байжа:

– Режим лэ ехээр туналаа, – гэжэ, бэрхэ гээд магтуулһандаа аягүйрхэн, харюусаба.

Цыпилма Эржэн хоёрой эгэшэдээл адли болохо гэжэ бүхы шадалаараа оролдодогыень тухайлбаб.

Эдээхэн басагадтай үнинэй танилшье наа, иигэжэ бүлэнэртөө наада харуулхыень түрүүшынхиеэ хараһан байгааб. Илангаяа Цыпилмагай “Октябрь” гэжэ шүлэг хэлэхэдэ, һонор хурсыень ехээр гайхаа һэм.

Наадаяа харуулжа дүүргэхэдэнь, баабайнь холонхой шэрүүн, хүдэр гарнуудаараа Галиингаа бишыхан, зөөлэхэн гарыень барижа: “Хүндэтэ хургагша, амаршалнаб! Һурагшадтнай эрхимүүд боложо байна. Саашадаа ажалаа үшөөл урагшатайгаар үргэлжэлүүлэгты,” – гээд, сохыень үндэнэ. Цыпилма Эржэн хоёрой толгойнуудыень эльбээд, хасарнуудыень таалаад табина. Энэнь тэдээндэ эгээл ехэ шан хэбэртэй: басагад урмашан хүхилдэнэ.

– Юун гэһэн бэрхэнүүд гээшэб! Сценэ дээрэ, олон зоной урда наада табихаар ёһотойл артистнар байна даа, – гэжэ би сэдхэл зүрхэнһөө тэдэниие магтааб.

Тиихэдэмни хүгшэн эжынь:

– Мүнөөшье артистнар лэ гээшэбди гэлдэгшэ. Хэзээ нэгэ болохол юм гээбы,– гэжэ омогорхон баясажа нуугаа һэн.

www.nomoihan.com